

**ԵՍԱՅԻ ՀԱՍԱՆ ԶԱԼԱՅԱՆԻ ՔԱՂԱՔԱԿԱՆ ԳՈՐԾՈՒՆԵՈՒԹՅԱՆ
ԳՆԱՀԱՏՄԱՆ ՀԱՐՅԻ ՇՈՒՐՋ**

ԶԱՎԵՆ ԱՐՁՈՒՄԱՆՅԱՆ

Աղվանից կաթողիկոս Եսայի Հասան Զալալյանի անունն անխզելիորեն կապված է XVIII դ. առաջին երեսնամյակի հայ ազատագրական շարժման հետ: Իսրայել Օրու, Մինաս Տիգրանյանի, Եսայի կաթողիկոսի, Երից Մանկանց Ներսես կաթողիկոսի, Ավան Յուզբաշու, Դավիթ Բեկի, Մխիթար Սպարապետի, Իվան Կարապետի և այլ գործիչների ջանքերով է, որ հայ իրականության մեջ արմատավորվել է ազատագրական պայքարի ոռոսական կողմնորոշումը, ստեղծվել է անդրկովկասյան ժողովուրդների հակաթուրքական պայքարի միասնական ճակատ, սկզբնավորվել և հաստատուն զարգացում են ապրել հայ-ռուսական քաղաքական, դիվանագիտական հարաբերությունները: Դեռևս XVIII դ. սկզբից զինվորագրվելով հայ ժողովրդի՝ ոռոսական ռազմաքաղաքական օգնությամբ ազատագրման գաղափարին, Եսայի կաթողիկոսն իր ամբողջ կյանքում զարմանալի նախանձախնդրությամբ ու եռանդով պայքարում էր այդ խնդրի իրականացման համար:

Իր ապրած բարդ ժամանակաշրջանի նման հակասական է եղել նաև ազատագրական շարժման այս երախտավորի նկատմամբ ցուցաբերված վերաբերմունքը՝ և՛ իր կենդանության օրոք՝ փոփոխված պայմաններին համապատասխան նրա գործերակերպում առաջացած տակտիկական փոփոխությունների, և՛ հետագա սերունդների կողմից՝ հայ ազատագրական շարժման մեջ նրա խաղացած դերի ամբողջական պատկերը գնահատելիս:

Եսայի Հասան Զալալյանի՝ 1726—1728 թթ. քաղաքական-դիվանագիտական գործունեությունը ճիշտ գնահատելու համար ելակետ պետք է ընդունել ոչ թե փաստաթղթերում պահպանված առանձին պիտակավորումները¹, որ գրանցում սպրդել են ազատագրական շարժման առանձին մասնակիցների՝ դեպքերից անմիջապես ստացած հապճեպ տպավորություններից, այլ ժամանակի ռազմաքաղաքական բարդ իրադրությունը, այդ իրադրությունը բացահայտող բոլոր փաստաթղթերի համադրումը, ականավոր գործիչների աներկբա գնահատականները:

Եսայի Հասան Զալալյանի գործունեությանը ճիշտ գնահատական է տրված Ֆ. Պողոսյանի հոդվածում, 1977 թ.² Տակավի՛ն 1974 թ. մենք ևս հանգամանորեն քննարկել ենք հայ ազատագրական շարժման այդ երախ-

¹ П. Арутюнян, Освободительное движение армянского народа в первой четверти XVIII в., 1954, էջ 232—233, «Армяно-русские отношения в XVIII веке», т. II, ч. I, Ереван, 1964, էջ LXXXVIII, «Հայ ժողովրդի պատմություն», հ. IV, Երևան, 1972, էջ 158, 159.

² Ֆրունզե Պողոսյան, էջմիածնի կաթողիկոսությունը և հայ-ռուսական հարաբերությունները XVIII դ. առաջին քառորդում (ՀՍՍՀ ԳԱ «Լրաբեր», 1977, № 4, էջ 24—36):

տավորի գործունեությունը և տվել այդ գործունեության տակտիկական փոփոխությունների պատճառները³։

1726 թ. գարնանը Անդրկովկասի նվաճումը թուրքերի կողմից իրական փաստ էր։ Վրաստանը, Հայաստանի և Ադրբեջանի մեծ մասը օկուպացված էին թուրքերի, իսկ Շիրվանի դաշտավայրի հյուսիսային շրջանները (Շամախի քաղաքով)՝ թուրքական կողմնորոշում ունեցող լեռնական ֆեոդալների կողմից։ Անդրկովկասի միակ շնվաճված մասը մնում էին Ղարաբաղի և Ղափանի հայկական շրջանները, որտեղ համառորեն պայքար էր մղվում թուրքերի դեմ։

Ուժերի բացարձակ անհավասարության պայմաններում հայկական շրջանների ազատագրական շարժման տեականության և համառության երաշխիքներից մեկն էլ Կասպից ծովի ափերը ռազմական ռուսական զորքերի աջակցությունը ստանալու հայերի ակնկալություններն էին։ Հայ ազատագրական շարժման ղեկավարները ռուսական արքունիք հղած իրենց բազմաթիվ խնդրագրերում շեշտում էին, որ եթե հայերի ազատագրական պայքարի այդ վճռական պահին օգնություն չստանան, ապա սղնախների օրհասական պայքարը երկար տևել չի կարող։ Սղնախներում ստեղծված այս վիճակի բարելավման համար որոշակի նշանակություն է ունենում հայերին հասած այն լուրը, թե ռուսական կառավարությունը պատրաստ է նրանց զինական օգնություն ցույց տալ մերձկասպյան ռուսական զորքերի հրամանատար գեներալ-ֆելդմարշալ Վ. Դոլգորուկովի և Վախթանգ VI-ի գլխավորությամբ⁴։ Սակայն այս անգամ ևս հայերի սպասելիքները չիրականացան. ռուսների փոխարեն Շամախի մտան թուրքական զորքերը, իսկ հունիսին սղնախների մատուցներում՝ Բարգայում, կենտրոնացավ Սարը Մուստաֆա փաշայի գլխավորած թուրքական և լեռնական ֆեոդալների միացյալ բանակը։ Թուրքական ռազմական վտանգը ավելի ծանրացավ սղնախների վրա և ավելի քան երեւիցէ անհրաժեշտ դարձավ ռուսական օգնությունը։ Եսայի կաթողիկոսը 1726 թ. մայիսի վերջին կանցլեր Գ. Գոլովկինին գրած նամակում նշում էր, որ եթե ռուսական օգնությունը մեկ ամիս էլ ուշանա, ապա ամեն մի սղնախ «ձեռաց կերթա»։ «Ըխտիար ունեք, շասեք թե չգրեցիք», ավելացնում է նա⁵։

Վտանգը չի ուշանում։ Թուրքական բանակի զորամասերը 1726 թ. հունիսի 10-ին նոր արշավանք են ձեռնարկում Իեպի Ղարաբաղ, այս անգամ հաշնի մեկիքության ուղղությամբ։ Թուրքերն ավերում, թալանում ու հրկիզում են այդ մեկիքության Ղազանչի, Զանկաթսղ, Ղապարթու և այլ գյուղերը, բնակչության մի մասին կոտորում, իսկ մյուս մասին՝ գերեվարում են։

Թուրքերի հետագա խորացումը կանխվում է սղնախների ուժերի հակահարվածով⁶։

³ Զ. Արզումանյան, Պյոտր I-ի Պարսկական արշավանքը և ազատագրական շարժման վերելքն Անդրկովկասում (թեկնածուական դիսերտացիա, անտիպ), էջ 23, 150—155, տե՛ս նաև նույն դիսերտացիայի ավտոգրաֆը՝ «Персидский поход Петра I и подъем освободительного движения в Закавказье», Ереван, 1975, էջ 29։

⁴ Г. А. Эзов, Сношения Петра Великого с армянским народом, СПб., 1898, վավ. № 214, «Армяно-русские отношения в XVIII веке», т. II, ч. II, վավ. № 330։

⁵ Ա. Գ. Բրահամյան, Մի էջ Անդրկովկասի և հայ-ռուսական հարաբերությունների պատմությունից, Երևան, 1954, վավ. № 72։

⁶ Նույն տեղում, վավ. № 74։

ին, խոսք, այդպիսի անհաջողությունը և հայերի համառությունը թուրքական մեծաքանակ բանակի ղեկավարներն անուշադրության մատնել չէին կարող: Բանն այն է, որ հայերի դեմ ուղարկվել էին միայն պատժիչ ջոկատներ, որոնց պիտի հետևեր թուրքական 40-հազարանոց զորքի հիմնական ուժերի հարձակումը, նպատակ ունենալով վերացնել հայկական սղնախները և ղրանով իսկ ոչնչացնել թուրքերին Մերձկասպյան շրջանները տանող հիմնական խուլընդոտը:

Թերևս թուրքական հրամանատարության՝ նման ձեռնարկման համար խթանիչ նշանակություն պետք է ունենար նաև ռուսների կողմից հայերին ցուցաբերվելիք օգնության վերոհիշյալ լուրը և քաղաքական առաքելությանը Մերձկասպյան ռուսական օկուպացիոն շրջանում Վախթանգ VI-ի գտնվելը: Ինչ խոսք, թուրքերը պիտի ձգտեին կանխել ռուսներին:

Ստեղծված իրադրության համապատասխան էլ պետք է կողմնորոշվեին հայ քաղաքական շրջանները, մանավանդ որ ռուսական կառավարության՝ զինական օգնություն ցուցաբերելու մասին տարիներ շարունակ տրված խոստումների չիրականացումը նրանց համոզում էր, որ թուրքական սպասվող նոր հարձակման դեպքում հայերը պետք է ապավինեին միայն ու միայն սեփական միջոցներին: Հենց այդպիսի մտադրության առկայության մասին է խոսում Նսայի կաթողիկոսի վերոհիշյալ նամակում արված «թե որ իսկի բնավ մեզ օգնության հասնելու չեք, էլվի մեզ մեկ սարեհ ջուղապ գրեք, մեր փիքրն քաշեմք, որ բանն բանեն անցել է» ակնարկը:

Սղնախների ղեկավարներն այդ խնդրի լուծմանը մոտեցան հաշվի առնելով Լտրաբաղի ռազմաստրատեգիական առանձնահատկությունները:

Բանն այն է, որ սղնախների ռազմաստրատեգիական հնարավորությունները տարրեր էին: Դժվարամատչելի կամ անառիկ վայրերում տեղակայված սղնախները ապավինելով տեղանքին, սակավաթիվ ուժերով ի վիճակի էին շարունակելու զինված պայքարը՝ ակնկալելով ռուսական կառավարության օգնությունը: Մյուս՝ դաշտավայրային և նախալեռնային շրջանների սղնախները (Ջրաբերդի և Գյուլիստանի մելիքությունների զգալի մասը) ի վիճակի չէին ինքնապաշտպանական սեփական միջոցներով ապահովել իրենց անվտանգությունը: Նրանք հեռու էին նաև ավելի հզոր սղնախներից և, հետևաբար, չէին կտրող նրանցից լուրջ օգնություն ստանալ՝ և թուրքերի ու նրանց դաշնակից կովկասյան լեռնականների հիմնական ուժերին դիմակայելով՝ կարող էին աղետի ենթարկվել:

Սղնախների ղեկավարները սպառնացող աղետի կանխման հարցը լուծեցին, ելնելով ստեղծված իրավիճակից ու իրենց հնարավորություններից: Ինքնապաշտպանության համար բավական ուժեր ու հնարավորություններ չունեցող շրջանները դադարեցրին զինված պայքարը և թուրքերի հետ կնքեցին յուրահատուկ մի զինադադար, ըստ որի հայերը պարտավորվում էին «իրենց գոյության ու խաղաղության համար թուրքերին վճարել ոչ մեծ քա-

7 Հետազայում՝ 1729 թ. հոկտեմբերին, Ռուսաստանի արտաքին գործերի կոլեգիայում Շոշ սղնախի ղեկավարներից Թարխան յուզրաշին իր հայտարարության մեջ նշել է, որ թուրքերի հարձակման ժամանակ նրանց հպատակվել են «սղնախներից հեռու գտնվող հայկական այն գյուղերը, որոնց իրենց զորքով (սղնախները—Չ. Ա.) պաշտպանել ոչ մի կերպ չեն կարող» (Г. А. Эзов, *նշվ. աշխ., վավ. № 299*):

նակով դրամ՝ որպես հարկ»⁸, իսկ լեռնային շրջանների սղնախները շարունակեցին զինված պայքարը:

Եսայի Հասան Ջալալյանն անմասն չմնաց այս իրարամերժ իրադարձություններին մասնակցելուց և հայերի համար ճակատագրական ու խճճված այս իրադրության մեջ քիչ ջանքեր չգործադրեց: Նա հաշվի առնելով Բարդալում ռուս-թուրքական սահմանագծման նպատակով դեներալ-լեյտենանտ Ա. Ռումյանցևի և Սարը Մուստաֆա փաշայի հանդիպումը, որով վավերացվում էր Ղարաբաղը Թուրքիայի տիրապետության տակ անցնելու փաստը, և համոզվելով փոփոխված քաղաքական իրադրության կայունության մեջ, Շոշ սղնախում գտնվող Իվան Կարապետին հրահանգավորեց պայքարի դրոշմ շխտարհած սղնախների ղեկավարներին հորդորել, որպեսզի նրանք զգուշ լինեն, իզուր տեղը չզրգոեն, ոտքի չհանեն շրջակա գյուղերի բնակիչներին⁹, քանի որ ռազմունակ ուժերը սղնախներում կենտրոնացված լինելու պատճառով նրանք զրկված էին ինքնապաշտպանությունից:

Եսայի կաթողիկոսի այս դիրքորոշումը ստեղծված անբարենպաստ պայմանների ու հակադիր ուժերի ծայրահեղ անհավասարության օրինաչափ արդյունք էր: Ռուս-թուրքական սահմանաբաժան հանձնաժողովների հանդիպումը նրան համոզեց, որ ռուսական կառավարության կողմից հայկական շրջանները թուրքական տիրապետության տակ անցնելու փաստի պաշտոնական ճանաչումն ունի տեական բնույթ և, հետևաբար, անիմաստ է ընթացիկ պայքարում հույսը դնել ռուսական զինական աջակցության վրա: Եսայի կաթողիկոսի համար պարզ է դառնում թերևս նաև այն, որ ռուսական զինական օգնության բացակայության պայմաններում ռուսական արքունիքի կողմից այդ նպատակով արվող հավաստիացումներն ունեն հայերի դիմադրությունը երկարաձգելու միջոցով թուրքական բանակի առաջխաղացումը դեպի ռուսահպատակ տարածքները կանխելու նպատակ, որը հայերի համար ռազմաքաղաքական սպառնալից հետևանքներ ունեւր: Եսայի Հասան Ջալալյանը, որն անշուշտ շահագրգռված էր զինված պայքարը շարունակելու հարցում, ստեղծված իրա-

⁸ Նույն տեղում:

⁹ «Պիտի հրամանքդ մեր տղոցդ խրատես փարաղաթ կենան, գեղարանց հետ բան չունին, թէ որ չէ՝ սոքա էլ կռիվ կանեն», — գրել է նա (Ա. Գ. Արարհամյան, նշվ. աշխ., վավ. № 75):

Եսայու այս հրահանգը մեր գրականության մեջ տարրնթերցման է ենթարկվել: «Հայ ժողովրդի պատմություն» բազմահատորյակի ակադեմիական հրատարակության IV հատորում (Երևան, 1972, էջ 158—159) այն հնչում է այսպես. «Հարկ է, որ համոզես մեր տղաներին՝ չանգիստ մնալ և շտարվել գեղջուկների տրամադրությամբ, բայց եթե այնուամենայնիվ կովի բռնվեն (թուրքերի հետ) թող հենց իրենք էլ պատասխանատու լինեն հետևանքների համար»: Ղարաբաղի բարբառում «փարաղաթ» կամ «փրղաթ» բառն օգտագործվում է «կամաց», կամ «զգուշ» («փրղաթ կաց», «փրղաթ դիր»), այլ ոչ թե «հանգիստ» իմաստով: Կարծում ենք, որ ձիշտ կլինի վերոհիշյալ հրահանգի այս ընթերցումը. «Հարկ է որ մեր տղաներին հորդորես զգուշ լինել, գյուղերի հետ գործ չունենալ [գյուղերը ոտքի չհանել], հակառակ դեպքում սրանք (թուրքերը) ևս կվերսկսեն հարձակումը: Նախորդ ընթերցմամբ ստացվում է այնպես, որ Եսային մտահոգված է միայն սղնախների ղեկավարների վիճակով և նրանց խորհուրդ է տալիս գյուղացիների ազդեցության տակ չընկնել և պայքարը շարունակել, մի խոսքով՝ ղենքը վայր դնել: Սա իսկապես կապիտուլյանտական կուրս կլինի: Իրականում Եսայու հրահանգը հանգում է նրան, որ անպաշտպան գյուղացիներին պետք չէ ոտքի հանել, այլապես թուրքերը կվերսկսեն հարձակումը, որը ողորդական վախճան կարող է ունենալ: Պայքարը պետք էր շարունակել ժողովրդի ռազմունակ մասով, որը կենտրոնացված էր սղնախներում, զինված էր և այդ անառիկ ամրոցներում կարող էր հաջողությամբ կռվել և պաշտպանվել:

վիճակում վարվեց հետևյալ կերպ. առերես արտահայտելով «թուրքահայատակություն», նա մի կողմից երաշխավորեց անպաշտպան ժողովրդի ֆիզիկական ապահովությունը, մյուս կողմից՝ պայքարի դրոշմը չխոնարհած սղնախների համար պայքարը շարունակելու հնարավորություններ ստեղծեց: Նրա հենց այսպիսի դիրքորոշման մասին ուղղակի ձևով ասվում է գեներալ-ֆելդմարշալ Վ. Դուրորուկովի 1729 թ. փետրվարի 5-ի՝ Ռուսաստանի արտաքին գործերի կոլեգիա՝ Ղարաբաղի հայկական սղնախներից ռուսական Մերձկասպյան օկուպացիոն շրջան անցած Ավան և Թարխան յուզբաշինների գլխավորած պատվիրակության մասին հղած մի հաղորդագրության մեջ¹⁰: Նրանում Վ. Դուրորուկովը մասնավորապես շեշտում է իր նկատառումները սղնախներում հակաթուրքական պայքարի համառության և տեղականության մասին ուղղակի նշելով «որ նրանք (հայերը — Զ. Ա.) դիմացել են միայն իրենց կաթողիկոս Սաայու խելքի ու պատվիրանների շնորհիվ, որն անցած ամռանը (1728 թ. ամռանը — Զ. Ա.) վախճանվեց»¹¹:

Հայտնի է, որ Վ. Դուրորուկովը Ա. Ռումյանցևի հետ միասին հայերին զինական աջակցություն ցուցաբերելու կողմնակիցներից էր¹², և աշխատում էր օգնել նրանց՝ ամեն կերպ հովանավորելով ու քաջալերելով զինված պայքարը շարունակելու կողմնակիցներին¹³: Հետևաբար, նա այդպիսի բարձր գնահատական չէր տա Սաայի կաթողիկոսին՝ ընդհուպ մինչև իր մահը՝ 1728 թ. ամառը սղնախների ազատագրական անգիջում պայքարը ղեկավարելու ասպարեզում, եթե 1726 թ. թուրքական «փաշայի մոտ գտնվող» կաթողիկոսը իսկապես իր կապերը խզած լինեիր պայքարող սղնախների ղեկավարների հետ և նպաստած չլինեիր այդ պայքարին: Եվ կարծես թե վերոհիշյալ մտքի հաստատմանն ու պարզաբանմանն է նվիրված այդ հաղորդագրության շարունակությունը. «Եվ շնայած նա (Սաային — Զ. Ա.) փաշայի մոտ էր գտնվում, այնուամենայնիվ իր գաղտնի հրահանգներով նրանց (հայերին — Զ. Ա.) չի թողել»¹⁴:

Առանձնակի նշանակություն ունեն նաև 1728 թ. ռուսական օկուպացիոն շրջաններն անցած Ավան և Թարխան յուզբաշինների գլխավորած բազմամարդ պատվիրակության հաղորդած տեղեկությունները: Եվ Վ. Դուրորուկովը, և՛ Ա. Ռումյանցևը (սույն հաղորդագրությունը կազմված է վերջինիս տեղեկությունների հիման վրա) բազմիցս նշում են, որ այս պատվիրակության ղեկավարներն «իրենց հանգիստ չեն տալիս» անընդհատ դիմումներով, պահանջելով ռուսական զորքերը մտցնել Ղարաբաղ և Շամախի:

Ռուսական զորքերը Ղարաբաղ և Շամախի մտցնելու մասին իրենց բազմաթիվ դիմումների ու պատճառաբանությունների ընթացքում տրամաբանական է, որ հայ յուզբաշինները պետք է նաև շեշտեին Սաայի կաթողիկոսի քաղաքական դավանափոխությունը և թուրքերին անձնատուր լինելը, եթե դա իրոք եղել էր, քանի որ նրա քաղաքական դերը շատ մեծ էր, և հայ պատվիրակներն իրենց վիճակի վատանալը պետք է բացատրեին նաև դրանով: Սա-

¹⁰ «Армяно-русские отношения в XVIII веке», т. III, Ереван, 1978, էջ 140:

¹¹ Նույն տեղում:

¹² Г. А. Эзов, նշվ. աշխ., վավ. № 289:

¹³ Վ. Մ. Մարտիրոսյան, Հայ և վրաց ժողովուրդների համագործակցությունը ազատագրական պայքարում, Երևան, 1971, էջ 202—203:

¹⁴ «Армяно-русские отношения в XVIII веке», т. III, էջ 140:

կայն մենք տեսնում ենք դրա հակառակ պատկերը՝ այն, որ ռուսական գեներալ-ֆելդմարշալն արքունիք հաղորդելով այդ բոլոր ասուլիսների բովանդակությունը, շեշտում է, որ Ծառի կաթողիկոսը շնայած գտնվում է «փաշայի մոտ», բայց և այնպես ապստամբներին ղեկավարել է իր հրահանգներով:

Եթե Ծառիին, իրոք, թուրքերին անձնատուր եղած լիներ, ապա դա Վ. Դուրդուրովը առնվազն պետք է դիտեր որպես դավաճանություն ռուսական շահերին և դժվար թե նրա մասին դրական արտահայտվեր:

Մինչև իր կյանքի վերջը հայ ազատագրական շարժմանը Ծառի կաթողիկոսի նվիրվածության մասին է խոսում և այն, որ 1727 թ. կեսերին ռուսաց արքունիքում պաշտոնական ընդունելության ժամանակ Բաղի յուզբաշին և Քյոխվա չելերին հայտարարել են, որ իրենք գործողված են սղնախների քաղաքական շրջանների կողմից՝ շեշտելով երկու կաթողիկոսներին էլ:

Վ. Դուրդուրովի վերոհիշյալ զեկուցագրում հաղորդվում է նաև ոչ պակաս հետաքրքիր մի այլ փաստ: Նա գրում է, որ Ծառի Հասան Զալալյան կաթողիկոսի վախճանվելուց հետո սղնախների ղեկավարներ Ավան և Թարխան յուզբաշինները գնացել են Իրանի «ինքնակոչ շահի մոտ»¹⁵, Անշուշտ պարսկական սակավազոր Թահմազ II շահի մոտ հայկական սղնախների ղեկավարների կատարած առաքելությունը հետապնդում էր քաղաքական նպատակ՝ հակաթուրքական պայքարում միասնական ճակատ կազմելու համար դաշնակցություն փնտրել: Այս առաքելությունն անհեռանկար քայլ էր, քանի որ շահը հայերին որևէ օգնություն ցույց տալ չէր կարող և, ընդհակառակը, ինքն էր զգում դրա կարիքը: Առաքելությունն ավարտվում է անհաջողությամբ:

Ծառի կաթողիկոսի գործունեության գնահատման խնդրում առկա որոշ անհստակության համար թերևս հիմք է ծառայում 1726 թ. նոյեմբերի 15-ին Ավան և Օհան յուզբաշինների անունից Մերձկասպյան շրջանների ռուսական հրամանատարությանը հղված նամակը: Նրա մեջ անհայտ նամակագիրը մասնավորապես գրել է հետևյալը.

«Ծառի հոգևոր տերն, քանի որ Ղարապաղումս մեկիք կա, ևս քաթխուդա կա, ժողովեց, ղոշուն կապեցին... և մեզ հետ կռիվ ին անում, թե մենք օսմանցուց ղուլուղկան ենք, ձեզ ուզիլ չենք»¹⁶, Մեր կարծիքով, եթե անգամ Շոշ սղնախը թուրքական բանակի կողմից պաշարվելու ժամանակ Ծառի կաթողիկոսն իր շքախմբով գտնվել է նրա կազմում, ապա ղրանով նա հետապնդել է երկու ուժերի բախումը մեղմացնելու նպատակ¹⁷, նամակագիրը, թերևս թուրքերի՝ 1726 թ. աշնանը ունեցած անհաջողությունների անմիջական

¹⁵ Խոսքը շահ Թահմազ II-ի (1729—1732) մասին է: Նա «ինքնակոչ» է դիտվում այն պատճառով, որ 1722 թ. սկսած, երբ Սպահանը գրավեց Աֆղան Միր-մահմուդը, Իրանում ընդհատվեց Սեֆյան դինաստիայի իշխանությունը և հաստատվեց աֆղանական տիրապետություն (1722—1729), չոր՝ շահ Սուլթան Հոսեյնի, գահընկեցությունից հետո նրա որդի Թահմազ II-ը իրեն հայտարարել էր շահ և սակավաթիվ ուժերով կռվում էր թուրքերի և աֆղանների դեմ:

¹⁶ Ա. Գ. Արաբաբյան, նշվ. աշխ., վավ. № 76: Հարկ է նշել, որ այս նամակը գրված է երրորդ անձնավորության կողմից. նրա տակ չկան հիշյալ յուզբաշինների ստորագրությունները: Նույն ճակատամարտի ղրվագների մասին այդ պաշտպանության մասնակից Իվան Կարապետի մանրամասն զեկուցագրում ոչ մի ակնարկ չկա Ծառի հետ կապված այդ միջադեպի մասին: Այս հանգամանքը կասկած է հարուցում վերոհիշյալ նամակում պարունակվող որոշ տեղեկությունների հավաստիության նկատմամբ:

¹⁷ Տե՛ս «Армяно-русские отношения в XVIII веке», т. II ч. 1, էջ XXXVII:

ազդեցության տակ, ձգտելով ռուսական ռազմական իշխանությունների աչքում ավելի բարձրացնել սղնախների հաղթանակի նշանակությունը, պաշարող զորքերի շարքում դասել է նաև ողջ Ղարաբաղի ուժերը:

Այս վավերագրի քննության կապակցությամբ բերենք մեկ ուրիշ փաստարկ: Նույն ճակատամարտի մասնակիցներից Թարխան յուզբաշին 1729 թ. հոկտեմբերի 21-ին Ռուսաստանի արտաքին գործերի կոլեգիայում արած իր հայտարարության մեջ մասնավորապես ասել է. «Ձնայած թուրքերը... մեծ հարձակումներ են իրենց (հայերի—Ձ. Ա.) վրա գործել, բայց առայժմ ամբողջ իրենց ուժերով դիմակայել են դրանց և ոչ մի հարկ կամ տուրք նրանց (թուրքերին—Ձ. Ա.) առ այսօր չեն տվել. միայն սղնախներից հեռու գտնվող հայկական որոշ գյուղեր, որոնց իրենց զորքով (սղնախները—Ձ. Ա.) պաշտպանել ոչ մի կերպ չեն կարող, իրենց պաշտպանության և հանգստի համար թուրքերին վճարում են որոշ քանակով դրամ՝ որպես տուրք»¹⁸:

Այստեղ սղնախները ներկայացնում են որպես Ղարաբաղի, ընդհանրապես բոլոր հայերի պաշտպան, իսկ նախորդ նամակում, ընդհակառակն, ամբողջ Ղարաբաղը հակադրվում է Շոշ սղնախին: Ինչպես տեսնում ենք, հակասությունն ակնհայտ է:

Վերահիշյալը մեզ հիմք է տալիս կասկածի տակ առնելու այս անստորագիր նամակում տեղ գտած կարևոր հարցերին վերաբերող որոշ փաստական տվյալներ, որոնք, ի դեպ, ինչպես նշվեց վերևում, չեն հաստատվում այլ աղբյուրներով: Ռազմաքաղաքական ու դիվանագիտական հարցերում սահմանափակ մարդու կողմից (ինչպես դա երևում է նամակից) ծայրի կաթողիկոսի քաղաքական կողմնորոշման ու գործելակերպի փոփոխման մասին խուճապային տրամաբանությամբ հաղորդված տեղեկությունները, կարծում ենք, հիմք չպիտի հանդիսանան ազատագրական պայքարի ղեկավարներից մեկի՝ Ծայրի կաթողիկոսի, գործունեության գնահատման համար: Հյավաստի և ճշմարտապատում են այդ ժամանակաշրջանի նշանավոր դիվանագետ ու ռազմական գործիչ գեներալ-լեյտենանտ Ա. Ռումյանցևի ու գեներալ-ֆելդմարշալ Վ. Դուգորուկովի հաղորդած տեղեկությունները, որոնք ամբողջացնում են հայ ազատագրական շարժման պատմության մեջ Ծայրի Հասան Զալալյանի խաղացած դերը: Նորերս գիտական շրջանառության մեջ դրված վավերագրերի քննությունը կրկին ու կրկին ցույց է տալիս, որ Ծայրի Հասան Զալալյան կաթողիկոսը հայ ազատագրական պայքարի քաղաքական կողմնորոշման հարցում ոչ միայն չի ցուցաբերել տատանումներ, այլ նաև՝ չեզոքություն: Նա մինչև իր կյանքի վերջը հավատարիմ է մնացել հայ ժողովրդի ազատագրական պայքարին ու նրա ռուսական կողմնորոշմանը, եղել է այդ պայքարի ղեկավարներից մեկը:

Խնդրո առարկա հարցի աղերսով վերջում տեղին ենք համարում անդրադառնալ XVIII դ. 20-ական թվականների հայ ազատագրական շարժման մեջ Զրաբերգի և Գյուլիստանի հայ մելիքների բռնած դիրքորոշմանը: Պ. Հարությունյանը, օրինակ, նկատի առնելով այն, որ այդ մելիքները 1724 թ. Գանձասարի ժողովում ռուսական արքունիքին հպատակություն չհայտնեցին, փորձել է ժխտել նրանց ռուսական կողմնորոշումը, նրանց մեղադրել թուր-

18 Г. А. Эзов, *нշվ. աշխ., վավ. № 299*:

քերին հպատակություն հայտնելու մտադրության մեջ¹⁹։ Այնինչ, թե՛ Երից Մանկանց վանքի կաթողիկոս Ներսեսը և թե՛ նրա երեք եղբայրները՝ Սարգիսը, Արրահամը և Եսային, թերե՛նց ազատագրական նկրտումներով նույնպես ապավինել են ռուսական զինվորական օգնությանը²⁰։ Գանձասարի ժողովում ռուսական արքունիքին հպատակություն չհայտնելը բացատրվում էր ոչ միայն սլավոֆիլների և թուրքերի վրիժառույթունից խուսափելու շրջահայեցությամբ, այլև՝ (որը, թերևս, գլխավորն էր) ռուսական զինական օգնության փաստական բացակայությամբ, հանգամանք, որը ծանր վիճակ էր սահմանափակում համառ. ստիպելով նրա ղեկավարներին դիմելու դիվանագիտական այլևայլ միջոցներին։ Եթե Ներսեսն ու իր եղբայրները թուրքերի կողմնակից լինեին կամ նրանց ենթարկվելու մտադրություն ունենային, ապա ի՞նչն էր նրանց խանդարում իրենց մտադրությունը իրականացնելու կամ ինչո՞ւ պետք է դաշնակցելին մյուս սղնախների հետ և համատեղ պայքարելին թուրքերի դեմ²¹։ — Իրավացիորեն դրում է Վ. Մարտիրոսյանը։

Այսպիսով, XVIII դ. 20-ական թվականների հայ ազատագրական շարժման այս կամ այն ղեկավարի գործունեությունը գնահատելիս անթույլատրելի է անտեսել այդ գործունեությունն իր ամբողջականության մեջ և նշանակետ ընդունել իրագործությունների հարկադրանքի տակ ձեռնարկված այս կամ այն դիվանագիտական քայլը, որոնց նպատակն էլ, ի դեպ, շարժման ընդհանուր շահերին ծառայելն էր։

К ВОПРОСУ ОЦЕНКИ ПОЛИТИЧЕСКОЙ ДЕЯТЕЛЬНОСТИ КАТОЛИКОСА ЕСАИ АСАНА ДЖАЛАЛЯНА

ЗАВЕН АРЗУМАНЯН

Резюме

Политическая деятельность последних лет жизни (1726—1728) крупного деятеля армянского освободительного движения 20-ых годов XVIII в. католикоса Есаи Асана Джалаляна у некоторых исследователей получила не совсем верную оценку. Анализ нововыявленных материалов показывает, что до конца своих дней он остался верен делу освободительного движения армянского народа и его русской ориентации, являлся одним из видных руководителей этой борьбы.

¹⁹ П. Арутюнян. *Նշվ. աշխ.*, էջ 228.

²⁰ Վ. Մ. Մարտիրոսյան, *սղն. աշխ.*, էջ 126.

²¹ Նույն տեղում, էջ 129.